



ՍՐԲՈՑ ՎԱՐԴԱՆԱՆՑ ԶՈՐԱՎԱՐԱՑ ՈԳԵԿՈՉՄԱՆ ԵՎ
ՎԱԶԳԵՆ ՎԵՀԱՓԱՌԻ ԱՆՎԱՆԱԿՈՉՈՒԹՅԱՆ
ՀԱՆԴԻՍԱՎՈՐ ՊԱՏԱՐԱԳ ՍՈՖԻԱՅԻ ՄԵԶ

Պուկարահայ թեմական խորհրդի նախաձեռնությամբ փետրվարի 2-ին հանդիսավոր իրադրության մեջ ոգեկոչվեց Վարդանանց տոնը՝ արժանի հարգանք մատուցանելով տասնհինգ դարեր առաջ հանուն հայ ժողովրդի հավատքի ու գոյատևման մարտիրոսացած հերոսների հիշատակին։ Նույն օրը նշվեց նաև Վազգեն Վեհափառ Հայրապետի ու թեմիս առաջնորդ Տիրայր սրբազանի անվանակոչությունը։

Առավոտյան Սոֆիայի Ս. Աստվածածին եկեղեցում տեղի ունեցավ հանդիսավոր ս. պատարագ ու հայրապետական մատթանք։ Օրվա պատարագիչն էր Վառնայի հայոց հոգևոր հովիվ Սիոն աբեղա Աղսմյանը։ Պատարագիչ հայր սուրբը պատարագի վերջավորության խոսեց հավուր պատշաճի քարոզ՝ վեր հանելով Վարդանանց պատերազմի պատմական նշանակությունը և դրվատեց Վեհափառ Հայրապետի հայրենամանվեր ու եկեղեցաշեն, ազգօգուտ գործունեությունը, կատարեց բարեմաղթություններ ու հրավիրեց ներկա խումներամ հավատացյալներին աղոթել ազգիս ընդհանրական Հայրապետի քաջառողջության ու թեմիս հոգևոր առաջնորդի եկեղեցանվեր աշխատանքների հաջողության համար։ Օրվա հանդիսավոր արարողությանց նախագահում էր Տիրայր արքեպս. Մարտիրոսյանը։

Հավարտ ս. պատարագի տեղի ունեցավ հանդիսավոր ճաշկերույթ «Պուկարիա» հյուրանոցի ճաշարահում, որին ներկա եղան Պուկարիո արտաքին գործերու մի-

նիստրի տեղակալ և Պուկար Ուղղափառ եկեղեցվո ու կրոնական այլ պաշտամունքների կոմիտեի նախագահ Լյուպոմիր Փոփով, Պուկարիո մեջ ԽՍՀՄ լիազոր ու արտակարգ դեսպան Վիկտոր Ծարափովը, հյուպատոսի ու իր տեղակալի հետ, պուկարահայ «Երևան» մշակութային միության կենտրոնական վարչության նախագահ Տիրան Բարիքյանը, Պուկար քույր եկեղեցու Ս. Սիմոնի գլխավոր քարտուղար Քիրիլ Եպիսկոպոսը, առաջնորդ Տիրայր արքեպս. Մարտիրոսյանը, թեմական խորհրդի ամբողջ կազմը և այլ պաշտոնական անձինք։

Պուկարահայ թեմական խորհրդի նախագահն էր պրն. Կարո Տեր-Մեսրոպյանը իր ողջույնի խոսքին մեջ վեր հանելով Վարդանանց տոնի կարևոր նշանակությունը, բնութագրեց այդ ճակատամարտի պատմական արժեքը հայ ժողովրդի պատմության համար, ամփոփ կերպով սեղանակիցներին ներկայացրեց Վազգեն Վեհափառի կենսագրականը՝ շեշտելով Նորին Սրբության երկարամյա խաղաղարար, եկեղեցաշեն ու հայրենասիրական գործունեությունը։

Ելույթ ունենալով Լ. Փոփով, իր խոսքի մեջ ընդգծեց Հայ և Պուկար եկեղեցիների և ժողովուրդների դարավոր եղբայրական կապերը և միևնույն ճակատագրերը։ Նա ներկաներին պատմեց իր տպավորությունները՝ անցյալ տարի դեպի Հայաստան կատարած այցելության ժամանակ Վազգեն Վեհափառի հետ հանդիպումից։

Խոսք առնելով, Խորհրդային Միության դեսպան Վ. Ծարափովը կանգ առավ հայ

Ժողովրդի ներկա վիճակին՝ ընդգծելով, որ ինքը մասնավոր հարգանք է տածել ի սկզբանե հայ ժողովրդի նկատմամբ, այդ հարգանքը ավելի ընդգծվեց այս օրերին՝ տեսնելով հայ ժողովրդի վճռական դիմակայումը աղետաբեր երկրաշարժին:

Հանուն Պուլկար քույր Եկեղեցու խոսք ասաց Քիրիլ եպիսկոպոսը, որը ներկայացրեց Մաքսիմ Պատրիարքի ջերմ զգացումները օրվա մեծ տոնի առթիվ ու ցանկացալ ազգընտիր Վազգեն Վեհափառ Հայրապետին անթափանց կորով ու նուանդ և աստվածաշնչական խաղաղ ծերություն ի պայծառություն Հայ Եկեղեցու:

Վերջավորության արտահայտվեց թեմա-

կալ առաջնորդը, որը եղած սրտաբուխ խոսքերի համար խորին շնորհակալություն հայտնեց, հիշեց հայ ժողովրդի երախտագիտությունը պուլկար ժողովրդի հանդեպ, որ Մեծ եղեռնի դժնդակ տարիներին եղբայրաբար ընդունեց հայ տարագիրներին: Այժմ էլ՝ բնության կույր տարերքի մոլեգնումի ծանր ողբերգությունից հետո Պուլկարիան անկեղծ գթասրտությամբ իր օգնության ձեռքը մեկնեց տառապյալ հային: Սրբազանը բարեմաղթեց, որ հայ և պուլկար ժողովուրդների բարեկամությունը աճի ու ամրապնդվի:

ՄԵՍՐՈՊ ԲԱՀԱՆԱ ՊԵՆԼԻՅԱՆ

